

第五三四册

博物彙編

草木典

(卷)

麥部

豆部

麻部

稗部

蔬部

藟部

蕒苡部

菰部

東臈部

三
一
三

三
一
三

四
一
三

四
一
三

古今圖書集成

中華書局影印

欽定古今圖書集成博物彙編草木典

第三十三卷目錄

麥部藝文一

賀麥登狀

謝賜大麥麪狀

皇太子賀嘉麥表

瑞麥賦

擬隴西郡開國侯來牟進封關內侯加食邑實

封制

代來牟謝表

溫陶君傳

代蔡州進麥瑞圖狀

陳州瑞麥賦

貽來贊

河南瑞麥頌

瑞麥圖說

瑞麥頌

麥秀兩岐頌

瑞麥頌

碭山瑞麥頌

周侯瑞麥頌

麥秀兩岐記

瑞麥記

瑞麥賦

麥部藝文二

觀刈麥

唐張九齡

前人

崔融

任瑗

高駢庭

宋胡鉞

前人

蘇軾

秦觀

宋祁

陳達叟

元趙允迪

白守忠

明劉基

蔣綬

李東陽

倪民望

周應賓

陳播

李葵

陸深

唐白居易

詠麥穗兩岐

詠瑞麥

朝會樂章

宮詞

陳麥

鴉種麥行

五禽言

遜往泉城穫麥

外孫文九伏中入村聯麥

遲往泉店殺麥

殺麥

打麥

麥苗已有生意掘鳥稜者未止

芟麥歌

刈麥行

次韻秀野滄波館刈麥

屢雪一麥可望喜而作歌

蕎麥熟刈者滿野喜而有作

種麥

次韻袁起巖瑞麥

刈麥行

田園雜興

江山道中麥熟

麥

農謠

大麥毒行

打麥詞

鄭畋

張聿

宋史

王珪

王安石

蘇軾

前人

蘇轍

前人

前人

前人

張舜民

王炎

王禎

戴復古

朱熹

陸游

前人

前人

范成大

前人

前人

楊萬里

前人

方岳

明宋謙

高啓

麥秀兩岐頌

瑞麥嘉禾頌

瑞麥嘉禾吟

瑞麥歌

麥浪

大廟薦麥

麥部選句

林儒

李三友

張朱明

左傑

申時行

董其昌

草木典第三十三卷

麥部藝文一

賀麥登狀

唐張九齡

右今日高力士宣垂示臣等皇太子表以嘉麥有成
陛下躬執勞事率先兆庶皇太子以下繼聖聖功臣
聞勤于稼穡必有弊麥之慶著在春秋則非他穀之
比伏惟陛下致敬宗廟屬意黎元春郊順時則千畝
在御禁園測候則萬寓皆豐况云立訓天人降尊農
務上靈昭德已開瑞日增輝當夏不疲則有祥雲自
賈是彰敦本之化式旌造物之功人謠在茲天意可
鑒且禹之盡力堯實用心史冊美談帝王成範未有
休徵神應若斯之盛者也以今况古千載未聞請付
史官天下幸甚

謝賜大麥麪狀 前人

伏以周人之禮唯有籍田漢氏之薦但聞時果則未
有如陛下嚴祇於宗廟勤儉於生人事必躬親動合
天德臣亦何幸近奉徵音又蒙聖恩優垂珍錫已飽
於聞義况霑此時羞綢繆渥澤未知報効死罪死罪

仍望宣牒史館以示將來

皇太子賀嘉麥表

崔融

臣某言伏見雍州司馬徐慶稱所部有嘉麥一莖六穗纖芒濯露疑因黑壤之宜香稼搖風若吐黃金之色豈非靈心昭應睿德感通降之自天何必來辨之詠嘗之於廟先符孟夏之時凡在含生相趨動色臣謬當居守肅奉宗祧一穗兩岐徒說張君之詠十畝千石方輕汜氏之書仰天意而增歡顧人心而載躍無任嘉忭之至謹附起居使某官某奉表陳賀以聞

瑞麥賦

任媛

建極惟皇昭鑠於光出豫考卜乘時省方西自鄠鎬東巡洛陽順天遊而有慶協日晷之云長徵賢宣室布政明堂風雨時序黎庶其康盡物稱瑞窮靈委祥明舍日月則階蓂恆秀澤及草木而隴麥登芳於是闕離宮通禁苑觀茲瑞之所應實皇恩之燭遠朝任得人時唯賢相九流分職三辰協亮稱堯舜之允敷同益贊而為唱曰珍瑞麥生我皇國凌寒而秀彰聖之德願載東觀之書以歌南薰之則既而帝曰欽哉天符聿來俾予光於四表惟爾翼於中台念幽芳之遂性知械樸之當材且夫麥之為瑞其德至矣居寒自生當暑薦美含實珠淨耀芒鋒起既標誅於詩人亦稱奇於繚史當其芄芄於野漸漸其秀將嗣穀以登年豈凌霜而不茂在昔唐叔嘉禾伊尹昭彼周王天人斯穆今惟聖帝此焉倏淑涵之如春也及晝而繁榮就之如日也來牟而紛紛則有小儒怡然鼓腹照水鏡之光鑒參歷選之題目未登高而賦成庶陳美於金竹者也

美於金竹者也

瑞麥賦

高敷庭

聖人順動文思欽明天地貞觀品物咸亨去憑虛而就安處面周洛而背咸京雲旗電發霜戟林行太陰用事其日在斗萬國來庭百神奔走泉潛動而荇落水益壯而冰厚冠異氣於繚垣吐嘉穠於寒藪不忌風雪全抽兩穗逼日月之光華得雲雨之攸利芒纖纖而擢隴葉青青而聳翠同泰谷之移暄類榆林之因地瑞紀增煥嘉禾異植出天苑以稱奇訪人寰而未識凌玉霜而表勁挺金莖而孤植顧耀穎於年和望生成於地力倬彼藩翰其代天工即漢庭之相國類晉室之清通拜殊祥而北首列圖史於南宮紆粹容於有穆冠鴻業而無窮實穎實粟是崇是奉可以為瑚璉之資可以為種桂之種偉長至之馭序同少陽之在侯成粒貴於鳥衙覆苗期於雄雉夫瑞也百王之珍事其生也二儀之大德道泰則稱物呈形政乖則羣方皆忒伊小草之何幸逢大人之允塞願均照於離明祈作禎於王國

擬隴西郡開國侯來牟進封關內侯加食邑實

宋胡鈞

封制

登寶祈春已課兩岐之最薦名告夏爰疏易地之封於皇孔碩之英貽我泰膚之美穀差吉日穡播欲言隴西郡開國侯來牟外叶坤黃內涵貴白載行于野懷大夫君子之忠斯賽我農成先公風化之業將其來食迄用康年漣沱對寵之時竟能濟業崆峒跨轡之頃遂底休庸庸進績於農書復侑忱於寢廟來咨來茹協在公助祭之恭實好實堅相尊祖配天之道爰易隴西之舊壤聿陞關內之新舍於戲雨露肥磽

之不齊爾既勉修於人事山川土田之大啓朕其加錫於侯功往服休思勉圖後效可進封關內侯加食邑實封

代來牟謝表

前人

代食維好績愧乏於善收往即乃封恩誤叨於登進自天錫命易地祇榮伏念臣桑下枯芩丘中槁苗鬢鬢黃髮老風雪之彫殘嗽嗽素心抱冰霜之潔白生樂國而無鼠苗之感歷元都而有兔葵之思因問俗於關中輒借階於陛下爰進仰舒之策勿令後時至形武帝之憂詔其益種飲使歐陽彭齡之所皆有春登夏實之資地方慮於不齊意敢希於所報詎期削木之質遽躋沃壤之區茲蓋恭遇皇帝陛下德猶祥雲政如時雨五穀共行謁未平膏沐之懽多泰同登播元在天錫之頌課吏奏漁陽之最談兵却新鄭之師以薦廟而勤相農民以問價而選掄使者肆令樛植亦被播種臣敢不小大懷忠艱難陳策諷原野南都之盛已幸富饒歌宮室故國之虛尚祈警戒

溫陶君傳

蘇軾

石中美字信美中牟人也本姓麥氏隨母羅氏去其夫而適石因冒其姓始中美之生也其父太卜氏以連山筮之遇師之革曰生乎土成乎水而變乎火坎以輳之坤以布之釜以熟之口以內之腹以藏之美在其中而暢於四支能者樂之以為大腹不能者傷之以為心病衆所說也善莫大焉故因以名字之中美幼輕躁疎散與物不合得其鄉人儲子之意因使從淦水湯先生游既熟遂陶而成之為人白皙而長溫厚柔忍在諸石中最有名儲子因秦故司馬錯李

斯子由趙高閣樂並薦於秦王得與甫田蔡甲肥鄉
羊夷內黃韓音子俱召見是時王方省覽文書日昃
未食見之甚喜曰卿等向者安在何相見之晚耶未
見君子怒如調饒卿等之謂也自是皆得進見充上
心腹賜爵土更上食典御旦夕各對所獻納時或蠶
疎上未嘗不盡善也秦王以嫪毐事出文信侯而遷
太后怒恚數日不食中美乘機進諫上說賜爵徹侯
食溫定陶二縣號溫陶君中美既被任用凡有造作
自丞相以下莫不是之其為人柔和有以塞說人之
口故也他日秦王坐朝日肝意有所思亟召中美將
虛以納之中美不熟計以進其說頗剛鯁志不快之
者累日有博士單軫說上曰爲其所傷矣宜有以
之即無患因進其弟子已升元華於上上意稍平然
自是遂疎中美不得爲尚食矣中美曰吾爲尚食日
夕自謂不素餐者今吾與羊生輩皆不得進縱復有
用者將誅辱乎昔也得充心腹而今也遠不信是有
不善我之心雖使時或思我彼將不盡矣遂稱疾以
侯就第其後子孫生郡郭者散居四方自號渾氏
氏索氏石氏爲四族云

代蔡州進麥瑞圖狀

秦觀

勘會本州自春已來屢得雨澤已於某月日具狀奏
聞訖今來二麥並已成熟地無高下所收斗斛數倍
當年及諸縣節次申送致麥苗有一莖二穗或三穗
其多有至五穗者甚多父老等皆云數十年無此豐
熟亦未嘗見有麥苗一莖至數穗者以此見臨御以
來功化日新利興害去善氣充塞致此嘉應臣待罪
郡守目觀其事不敢隱默謹畫成圖子一本隨狀上

進以聞

陳州瑞麥賦

宋祁

冠三輔之上者莫過於陳接五穀之乏者孰先于麥
當乘離之令序挺降斜之瑞植盛氣雲鬱混麟臨之
初弄密穗金繁動星田之霽色兩岐旁秀六穗并出
厥華芄芄厥穎粟田峻奔告守臣駭觀俾來以圖
悉上送官他穀弗書示麥禾之最重吾王攸助知稼
穡之維艱洵北爰采罔即乎力農關中益種無聞於
錫祉詎若天極歸昭明神效異借蕃椒之盈升配命
禾而合穗迎層宙之休氣冠中田之嘉穀續我於瑞
圖辨我於凡菽蒙至尊之渥惠播頌聲于弦次上可
以薦清廟之馨品下可以助外饗之食劑

貽來贊

陳達叟

貽我來思玉屑塵細六出飛花天一生水

河南瑞麥頌

元趙允迪

百穀茂兮盈田疇種之微兮惟棘粃金與生兮火與
收覆隴畝兮黃雲秋兩合穎兮三並穗四垂金兮周
綴蒂驚野老兮見來未作歌謠兮薦嘉瑞二千石兮
其惟良匪監候兮誰可當來賓僚兮躋公堂望北闕
兮遙稱觴百拜稽首兮俯伏言颺一人有慶兮萬壽
無疆

瑞麥圖說

白守忠

奉定丙寅冬李侯文晦守濟明年夏瑞麥生而劉氏
大器之別墅爲尤異穗有岐而至四五者衆欲上聞
侯拒之劉氏乃圖藏於家侯後擢御史終閩海憲副
大器亦卒後十又八年侯之子國鳳從劉氏子本得
是圖不忍湮沒弗傳濟人將勒諸石徵說於余竊

惟休徵嘉瑞其類非一景星慶雲之照乎天甘露醴
泉之溢乎地朱草靈芝之產乎宮室蓋必有以致之
非偶然者若夫禾麥之瑞所關尤重八政食貨爲先
孰有過于是哉思文之詩曰貽我來牟帝命率育臣
工之詩又曰於皇來牟將受厥明明昭上帝迄用康
年蓋麥之成先于五穀可以占豐穰可以濟乏匱是
故詩人兩言來牟推原所自必歸乎上帝之命上帝
之賜而歎美不已也李侯治政致祥不有厥善久而
彌章有子以文雅稱予嘉其志作瑞麥圖說俟名網
濟南人至正癸未歲春三月朔汪澤民書於兗州之
寓舍余方居憂客攜瑞麥圖見示一莖至五穗或三
四穗詢所自考其年實李公文晦治濟州時也嗟夫
舊祥之來皆人所致必人事順于下而後天道應于
上維我聖元以神化天下公能宣而布之誕而敷之
此其感召之著乎箕子曰雨暘燠寒風時之各得其
敘則庶草蕃廡此豈特庶草蕃廡乎成王曰至治馨
香感於神明此豈非感於神明者乎子思曰致中和
天地位焉萬物育焉此豈非中和之所致乎天人之
相感精祲之相盪微妙而不可測者莫有甚於斯也
蓋公愛物之仁出於誠一是以人樂其德神降厥祥
嗚呼此豈人力之所能哉後公敷歷臬府入拜御史
終閩海憲副時去濟七十餘年矣而濟人追慕不已
爲之遺愛去思之碑則其德化及人之深可知矣公
平昔與先父爲厚余撫卷不覺泣下因謂客曰與其
傳諸圖曷若勒諸石以示悠久俾世之疎厥職者有
所監戒焉

瑞麥頌并序

明劉基

天厭元德九州糜沸羣猾並作黎民惶惶奔走無路皇帝提三尺劍奮起草萊指顧之間豪傑景附矛鋒所向戰克攻取皇帝心知天意之有在爰舉有衆以與萬姓請命一征而取荆襄再征而清浙

江三征而閩海率從四征而席卷全齊五征而定

周及梁遂取秦晉舉燕越南交北霸東裔西羌海外之邦莫不望風遣使奉朝稱臣拜伏闕廷於是

民獲所歸上下神祇咸有依託慶雲甘露奏禎祥帝心謙抑每讓否居三年五月陝西寶雞縣進

瑞麥一莖五穗者一本三穗者三本兩穗者十有餘本蓋自兵興以來王保保據周宋李思齊張思

道據秦燕晉趙齊梁之間大豪小猾或憑城郭或聚山寨皆假元爲名分割境土擅兵相攻於是燕

晉周齊之地彌數千里連歲無雨百穀不生民相殺食且盡今年夏四月王師奏捷於蘭州朔漠掃

清關隴底定天乃大降甘雨滋爲嘉瑞和氣致祥不亦昭哉周頌有曰綏萬邦屢豐年天命匪懈傳

者謂商之季年比歲旱荒武王克紂受命而天下遂獲豐年由今觀之信非誣矣漢謠以麥穗兩岐

歌其太守之美政則是兩岐之麥所希有而況於三岐以至五岐者哉頌聲之作弗可缺也頌曰

神雀赤鳥其羽不可以爲儀紫芝平露其實不可以療饑豈若五穀之爲瑞可以厚民之生豐國之資者

哉元失其鹿天下共逐擾擾紛紛強食弱肉皇天震怒誕命眞主肅將天威以靖區宇騎士如雲猛將如

龍發縱指示悉出帝衷遂定西北居民攸奠品物咸殖爰有嘉麥一本五岐布葉萋萋結實離離既濟既

平先百穀成擢穎揚芒金枝翠英溥彼原田滂若雲烟望之油油卽之芊芊其種伊何降自穹昊其瑞伊何豐年之兆豐年穰穰頌聲洋洋其始自今奕世無疆

麥秀兩岐頌

蔣玟

芄芄者麥在彼海濱瘠鹵不毛飮氣蒸薰芄芄者麥在彼湖汜下淖匪宜昭德之修昭德之修陰陽順成和氣高節甘雨時零一本兩岐同莖異穎如木理連如蓮蒂並木則美矣何用之施連則特矣何療于饑惟麥之禎先百穀成可資可食運木斯輕其種伊何上天降康其兆伊何豐年穰穰不知帝力曷報侯德其始自今思慕無斂

瑞麥頌并序

李東陽

瑞麥頌豐年也和氣旁達嘉麥效祥頌聲作焉以宣上德昭農事也

維田有麥載被其隴既堅既實岐岐總總我場我隴其積如踊皇德斯播於植於動維此瑞麥曰帝之寵維麥在田載耕載耨我手足劬我耜鋤以夕以朝中心孔怡載拊而謳於歲之秋曰茲豐年維我民勞天監帝德亦念民阻噓以和風渥以甘雨貽我嘉麥及我穀黍維年之祥祈不我拒以徧率土於天之下於天之下末荷皇恩

碭山瑞麥頌并序

倪民望

聖天子新握乾符敦教禮者碩迎和勸耕下詔正人心微官邪皇極蕩平察人計吏掄其九異者召見獎資風天下以教養實政得人二十有五碭山王令廷卿與焉豈非希世之奇觀哉令祇懼矢報稱

還省歲事適二麥重穎穡人告瑞有一莖四穗至五穗者三岐兩岐無論焉見者瞿然異之夫碭濱黃河頻罹巨浸胡爲有是哉良以爲之上者協德宣和潛消陰沴故漁陽麥秀之歌復見於芒碭旌異之後詎非當宁寶賢育民之徵應哉昔成王釐

戒農官來牟受明吉人藹藹弗祿末康召公以爲

車馬禮賢之致我皇上冲齡踐祚志氣清明中外夾輔俾爾彌性庶幾見之今茲麥瑞其至治開先

者乎嘗考聖祖統天麥瑞獻於陝之寶雞今碭有寶雞之瑞而莫之獻固盛世臣子憂世之道宜爾

也獨可無言以紀之歟拜手稽首偕效歌頌頌曰於惟皇祖肇茲丕基來牟率育瑞應寶雞受天之祐

太史摘詞綿綿豐芒以燕以貽迨我皇上神聖冲資勳民法祖茂行純禮禮者旌卓百工允釐中外寧謐

品彙咸滋騰茲芒碭大河之涯洪流作沴民用阻飢帝命中丞節鎮撫綏肅肅侍御有美監司循承宣

惠我黍黎太和薰洽綠遍新苗芄芄者麥載見多岐黃雲往苒翠浪紛披三事成始九穀其宜豐年穰穰

帝力何知足民裕國末祚雍熙明明天子萬壽無期

周侯瑞麥頌并序

周應賓

泰和在宇禎符駢集維茲嘉穀爲上故穎書異畝穗詠兩岐誠貴之也寧海尾閭之墟地確民愁我一二良收劑量爲之亦三瑞名堂連理名鄉協和

萬邦此其一微也已今上御曆惟長吏之是簡西粵曹侯至玉芝兩生其廩記者張其應爲聖明壽

比今二十餘稔復有周侯瑞麥之事侯所謂易直子諒者授寧令以人情爲田戴星而作智辨去莠

康泉流之聲德有薦亦有神明所默通也歲乙卯
會早曠之災行民羸幾卒侯曰嘻罪在民牧走寧
龍神跋涉于蒸暑澍雨旋作穰穰告成既喜以名
其亭迨丙辰觀還瑞麥生畦同莖岐穗秀漸漸實
殷殷野老獻之侯曰置之吾聞上瑞一乳二十亦
一稔二米岐麥何爲者若從其類于以兆豐年天
作寧邑而今敢有之以爲名乎閱諸衙齋已是夏
復早寧禱如昨霖亦隨之其豐樂可知也繼之往
視畦麥依然兩岐矣侯猶抑不自居諸父老苦侯
德之不彰余託鄰境匣而傳觀抑以海上外史必
能揚挖之耶外史氏曰異哉信哉即未敢迂引思
文所貽其樂不支莫可歌乎且芝記有在召父杜
母後先以之微獨河潤溉于其鄰維茲嘉頌良足
爲斯世協和一式化已于是載筆爲頌以歸之侯
名維鯤字仲化閩之浦城人其頌曰

逖彼海邑閩風拂挹旱魃爲濯滂焉歲饑仁侯開濟
百爾其疏滯乞龍之靈徒跣而往忽雨乎青冥庭碩
遂矣于清和之月半有瑞矣一莖今兩岐護雲房兮
露藥滋桑之既樵雉于飛伊其農夫之依漁陽復歌
仁侯不受厥瑞云何豐年斯告何天之眷亦民之造
亢早來連載忘之處其雨其雨奚獲焉麥之又岐瑞
豈偶然曰維屢豐會孫之庚歲事攸其馨香發彼鄰
亦吳聞頌聲播此匪標之名王國之禎言比嘉木事
觀化成

麥秀兩岐記

陳播

泰和之世風不條鳴雨不塊破霄露瑞雪以時而至
靈芝嘉穀隨地而生嘗聞其語矣喜於今驗之一日

肄業靜成齋南莊老人袖一卷徐言曰鄉民有王姓
進名者佃予田丁巳之四月忽持兩岐之麥二本數
莖者示異於予予自揆謝事之餘何所可致其邑侯
牧愛之應乎予宜有記因歷思往古質諸傳記而知
夫麥貽我來牟有邵未嘗以爲瑞也桑下青青南陽
亦未嘗以爲瑞也迨漢張堪太守漁陽民有樂不可
支之歌始著其爲瑞夫和氣召祥盛德致應老人推
建昌貳黃州嘗蒙旌異其身褒贈其親者乃不自居
而以歸之邑侯邑侯自其令崑山吾固熟其有古循
吏風幸由高平轉吾邑善政善教不容彈述行萬司
風紀大柄用其致此應宜矣但恐亦不自居而以歸
之天子天子明聖敬天勤民亦未必自居而以歸之
穹昊雖然不居者謙光也上之德終可忘而事之異
終可泯耶遂筆以記而系之歌老人爲誰別駕吾邑
陳公一元也邑侯爲誰名進士慈谿楊公名父也記
之者誰鄉進士海虞陳播也歌曰涼風搖波當麥秋
飄然雅質非羣流酣酣尚效筵初醉聯翩似學漢濱
遊芳塵素與風姑遊移根不待金盤貴丘中嬾嬾實
同芳桑下煌煌皆並蒂仙娥攜手下蓬山皇英齊駕
鳴珮環柴桑金綰駢肩菊湘沅玉挺同心蘭何如一
莖九穗古來異兩岐此日眞爲瑞香沃畦峒雨露鄉
邑迷錦里烟霞地化機闔闢爲鍾奇君侯德化從可
知共是食和與沐澤家家率有無愁饑況且西成尤
可喜歲歲豐穰自今始聖明天子官循良漁陽豈得
專斯美重歌勝事列篇章少答天公呈至祥聖明天
子官循良勒諸金石矢弗忘

瑞麥記

李葵

春秋記災異略祥瑞聖人微意也僖公三年六月雨
乃大書蓋雨時若則百穀登軍國足民生有需矣攸
繫匪輕此聖人所以書之太和濱穎俗古民瘠厥田
孔蕪爲中都僻邑正德辛未歲經賊殘毀繼值水患
尤戾閔丁丑關中許君世昌吏茲土君通儒也政先
仁愛居無幾六事允修嘉慶咸集僻壤則我王畿大
地之盛槩可知矣

瑞麥賦

陸深

僕聞居田野多見瑞麥兩岐三岐至五六岐彼九
岐者得於傳聞始末之見云實有之感茲休禎作
賦一篇有頌有美有風有刺義主勸戒附於古詩
人之諷諫雖不足以希蹤相如子雲庶東京之流
亞也示我同志靡得而布焉

天子正德五祀孟月維夏知子子瘍發下體更朔新
愈有客嘒焉登堂三揖乃掀髯吐論曰夫物有異產
事有奇遭噉肉者不可與論味昧采者不可與即文
闕哉希乎今茲之所觀也子足良苦抑未之知乎知
知子蹶然而起危襟橫几奉客下風曰唯唯願客諒
之客曰走故農家五穀是理爰自弱齡勤厥四體今
年逾知命而豐穰凡幾一畝三石稂莠吐米皆未若
今歲之爲瑞也麥苗凡几穗岐爲二揚芒含穎復爲
三四多者五六將將覆地東鄰一莖九岐尤異始淳
和之所薰蒸而上帝用以錫類也周書異畝漢歌兩
岐陋昔人之誇詡昭后皇之惠慈雖蒙白之翁負元
之老皆緣畝玩視相與嗟咨若若者齒髮猶盛涉歷
未廣宜乎驚悸而駭頤也知知子仰屋太息索然久
之曰否否客何談之藍也夫緣物者貴實敷文者適

用且夫麟鳳之希難以療饑芝菌之祥難以充庖雲錦之爛難以禦寒蟻蚌之光難以續膏是以聖明抑難得之貨壅不稽之言誠以重本而緩末棄無益而即有用也客幸目睹岐麥津津瑞民瘼甚矣果誰之致獨非客之所觀見者乎試為客語往歲己巳運厄元夏夏耘被壅淫雨注天晝夕閱七颶風相率海波怒而山立江潮噴以駿奔蛟龍舞於街衢岡阜淪為潚淵漂尸橫野浮畜蔽川千里一壑萬竈絕烟於是百年之完聚連邑之生全化為魚鼈葬於鯨鯢者殆過半矣暨乎水退民失故居滄桑一變形勝都非朱門沈其閭閻碧瓦蕩為丘墟鳥窺巢而不下孤訪穴而重疑號哭振野提負沿途父棄其子妻別其夫相與轉徙乞丐奔逐投依若流星之逼曙而敗葉之辭枯也於是強有力者牢朽材於古岸寒行潦以腐薪依濕林為棟幹綴敗席為閭閻涸轡無別臥食不分什併為五棄仇講鄰相依為命枵腹連旬野無留菜樹不遺根微幸於萬一苟活於旦昏爾乃積陰鬱結隆冬盛寒層冰千尺竹柏枯乾豈祝融之故都為元冥之停驂何暖暖之陽國顧風烈於塞垣民無風具習不素安於是受凍而仆者又如千矣天子方軫念南服融照閭閻發德音大王言貸常賦關四門封簡書於芝檢勤使者於輜軒省大官之供調減司寇之坐論賑倉廩之儲積獨通負之浩繁方將奪民命於溝壑續生氣於遊魂蓋三五之罕有而二氣所不能全之曠恩也良有司方憂經費之不足懼考課之殷後鴻澤持而不下限令疾於電走朝四暮三示一藏九使民破十家之產僅足以輪一家費數畝之田

未足以賦一畝節鼓盆村擾及豚羽爾乃制為嚴刑迨及黃耆巨木囊頭重金繫肘臂無完膚指欲墮手豁壑之填未厭伸暴之門何有於是子遺之民瘡痍之末斃於敲扑困於征科者蓋淪胥以盡漸不可久矣戾氣醞釀蒸為疫癘方且乘陽發騰橫不可制今枕籍而病臥者比比皆是招醫降巫若憤若醉是其凍餒蝕於胃腸刑罰慘其心志發變伏而並攻何方藥之能治厥禍方萌始未知其所至也使輩畝之植一本而十岐共蒂而百穗將安救之而客誇以為瑞哉且技粟所以貴於珍鼎布縷所以加於元黃者為其有用也今夫用者徒存而用者已亡是謂隆虛而病實忘遠而嫫細矣僕竊為客贅而不取也客聞而撫然曰噫嘻有是哉子之迂也信乎執一者未足與權二泥彼者不可與適此子徒鑒於己巳之變為流而不止乎是殆滯於陰陽之迹而未深于斯理者也且夫於穆之化園運不已剝終必復泰因於否吉凶互尋禍福相倚夫蟲之蠕蠕也不屈不發地之隆隆也不伏不起數逆斯通氣順乃死是故九載之水或以成堯七年之旱終以啓禹子豈知夫凶險之後繼之以豐稔登進之漸承之以君子耶然而氣機橐籥必有攸始兆先於物發達伊邇鐘鳴而隕霜礎潤而降雨走誠得於俯仰之餘是以釋近憂而崇遠喜也且夫麥備四氣實首五穀詩人頌其於皇下垌賴以率育續歲功於發春函潛氣而多淑是休嘉之先露後斯理於將復示帝心之仁愛啓方來之祉福諒有開而必繼孰無徵而邁獲走且與子託丘壑以優游味皇風之清穆是故有取于麥岐子何責之備而

論之刻邪知知子不能難客乃躡履而退曳杖而歌歌曰麥秀兮多岐覆壘今壘壘彼其之子曾是今弗思於是知知子返子潛室沈思淵默緯情慄於渾淪抽端緒於開闢推元化之始終考休咎於遺圖覽春秋之所書測消長於三易道有殊而歸同理既契而心戚然則客之言似亦未為失也將以厥明戒館客循阡陌辨麥岐之疎數聽鄰黨之損益問勤勩於三時弔疾苦於緩急於時風輕景融煙朗霧清謝雕輿却繁縷被大練策溪藤道以童子從以經生指三汀以東驚遵龍江而緩征瞻桑梓于原隰拜松楸于佳城聯海氛於極際儼波浪之奔轟感釣游之舊跡慨歲月之不停萬里墟之蔓延有孤物而屢更亦浮雲之多態何難樹而易傾恨久寄于異土心戀戀乎故京方徘徊以瞻眺蹇彷徨而屏營顧見道左麥穗岐岐本同末異旁無附枝始戟戟以競秀竟變變而莫攜將神工之妙合復化鈞之巧持或雙昂以森矗或左右以紛披或越吹而希挺亦共房而駢垂薄長飄以洄洑照圖景而陸離等比翼於異類嗤連理而不為固物薄而稟厚騰衆喙以增奇胡哲人之超軼隨所如而見疑昔宣尼之瑞魯匡人怪而圍之比干之忠殷曰不祥而戮尸彼二聖且猶然般羅此又何辭抑軒輊之偶致將彼蒼之有知於是歷覽既倦義馭未疲攬厥穎異采掇以歸洵皇澤之滲漉拯黎民於阻飢託子墨以宣祕聊洋洋以陳辭

麥部藝文二詩

觀刈麥

唐白居易

田家少閒月五月人倍忙夜來南風起小麥覆隴黃
婦姑荷簞食童穉攜壺漿相隨餉田去丁壯在南岡
足蒸暑土氣背灼炎天光力盡不知熱但惜夏日長
復有貧婦人抱子在其傍右手秉遺穗左臂懸敝筐
聽其相顧言聞者爲悲傷家田輸稅盡拾此充饑腸
今我何功德會不事農桑吏祿三百石歲晏有餘糧
念此私自愧盡日不能忘

詠麥穗兩岐

鄭畋

聖慮憂千畝嘉苗薦兩岐如雲方表盛成穗忽標奇
瑞露縱橫滴祥風左右吹謠謠連上苑化日遍平陂
史冊書堪重丹青畫更宜願依連理樹俱作萬年枝

詠瑞麥

張聿

瑞麥生堯日芄芄雨露偏兩岐分更合異畝穎仍連
冀復明王慶寧惟太守賢仁風吹靡靡甘雨長芊芊
聖德應多稔皇家配有年已聞天下泰誰爲濟西田

朝會樂章

宋史

芄芄嘉麥擢秀分岐甘露夕灑惠風晨吹良農告瑞
循吏稱奇歸美英主折而貢之

宮詞

王珪

六龍觀稼奉宸遊齊賀豐年薦麥秋後苑宴回卿相
出內官金合送來舞

陂麥

王安石

陂麥連雲慘淡黃綠陰門巷不多涼更無一片桃花
在借問春歸有底忙

鴉種麥行

蘇軾

霜林老鴉閒無用畦東拾麥畦西種畦西種得青荷
荷畦東已作牛尾稀明年麥熟芒攢粟農夫未食鴉
先啄徐行俯仰若自矜鼓翅跳踉上牛角憶昔耕
歷山鳥爲耘如今老鴉種麥更辛勤農夫羅拜鴉飛
起勸農使者來行水

五禽言

前人

去年麥不熟挾彈規我肉今年麥上場處處有殘粟
豐年無象何處尋聽取林間快活吟

遜往泉城穫麥

蘇轍

少年食稻不食粟老居穎川稻不足人言小麥勝西
川雪花水磨煮成玉冷淘槐葉冰上齒湯餅羊羹火
入腹五年隨俗蠶得飽晨朝稻米纔供粥兒曹知我
老且饑觸熱泉城正三伏田家有信呼即來亭午驅
牛汗如浴吾兒生來讀書史不慣田家爭斗斛今年
久旱麥粒細及半罷休饒老宿歸來爛熳煮耳求
歲未知還爾熟百口且畱終歲儲貧交強半倉無數
外孫文九伏中人村畝麥

前人

春田不再憂無麥入困得半猶足食伏中一膳不得
緩早田蒼耳猶難得人言春旱夏當潦入伏未保天
日好老農經事言不虛防風防雨如防盜

遲往泉店殺麥

前人

罷民不耕穫豈利有攸往古人爲我言許此亦無妄
一冬免鋤犁二麥盈囊盎火老金尚伏雨過築場壤
鄰家助伯亞蒼耳割榛莽朝陽得終日經歲可無恙
老夫終病慵長子幸可仗劬勞慎勿厭耕佃家共享
秋田雨初足已作豐熟想歸來報好音相對開臘醅
殺麥

前人

麥幸十分熟雨過三日雲初晴尚未伏半夜卷重陰
細築場無隙輕推磨有音驚聞諸縣水一照直千金
又

打麥

張舜民

打麥打麥彭彭魄魄聲在山南應山北四月太陽出
東北纔離海嶠麥尚青轉到天心麥已熟曷日催人
夜不眠竹雞呼雨雲如墨大婦腰鎌出小婦具筐逐
上壟先捋青下壟已成束田家以苦乃爲樂敢憚頭
枯面焦黑貴人薦廟已嘗新酒醴雅容會所親曲終
厭飲勞僮僕豈信田家未入唇盡將精好輸公賦次
把升斗求市人麥秋正意又秋禾豐歲自少凶歲多
田家辛苦可奈何將此打麥詞兼作插禾歌

麥苗已有生意掘鳥稂者未止

王炎

兒童飯犢女採桑水滿東臯耕事忙稻秧半綠麥半
黃天許食新餽粥畚田父咨嗟仍笑語赤地一年今
得雨紫葢有根妻子喜兒填溝壑壑間里

芟麥歌

王禎

田家食力不食智耕麥年年勤種時老農八十諳地
利暑夏呼兒先曠地再耕再耨土華賦手把耒耜知
已試土沃不妨投種概今年已報春澤被夏苗苗深
如櫛比薰風長養見天意獵獵青旗催種穠穗結穉
胞花雪墜赫赫職職熾熾燧燧著精華輸主味粒飽
芒森密如簪頓失前時浪翻翠豈知真宰調元氣化
作黃雲表嘉瑞老農眼飽雖自慰且夕却憂風雨至
子婦奔忙事芟器彭翻翻轉雙臂曳龍腰間盈復

棄急載牛箱夜無寐轉首登場簇高積風翻日碾半猶未已向公門奉新餽糊材和糴凡幾大年餉巡門仍語諄夏稅有程今反易自餘宿負如取寄指此有秋爭蟻萃一得豈能償百費終歲勤勞一獻欸昨日公堂宴賓貴樽俎橫陳混肴截檀板珠繩按歌吹萬錢不值供一醉庖人搓揉出精粹尚喜食新誇餅餌物不天來皆力致飽食何人知所自春祈夏薦禮所記報本從來追古義但願斯民不畏吏吏不擾民自遂凡在牧民遵此治坐見兩岐歌政異日富困倉均被賜不使老農憂歲事

刈麥行

戴復古

腰鎌上壟刈黃雲東家西家麥滿門前村寡婦拾漚穗餽粥有餘炊餅餌我聞淮南麥最多麥田今歲屯干戈飽飯不知征戰苦生長此方真樂土

次韻秀野滄波館刈麥

朱熹

貽牟風昔但聲歌今見郊園樂事多且喜既獲符善禱未須蘆葦攀妖娥霞觴政自誇真一香鉢何須問畢羅我欲賣刀來學稼不知還許受塵塵

屢雪二麥可望喜而作歌

陸游

苦寒勿怨天雨雪雪來遺我來年麥三月翠浪舞東風四月黃雲暗南陌坐看比屋騰歡聲已覺有司寬吏責腰鎌丁壯傾閭里拾穗兒童動千百玉塵出磨飛屋梁銀絲入釜須寬湯寒醅發劑炊新裂新麻壓油寒具香大婦下機廢晨織小姑佐庖忘晚粧老翁飽食笑捫腹林下擊壤歌時康

蕎麥熟刈者滿野喜而有作

前人

城南城北如鋪雪原頭家家種蕎麥霜晴收斂少在

家餅餌今冬不憂窄胡麻壓油油更香油新餅美爭先嘗獵歸熾火燎雉兔相呼置酒喜欲狂陌上行歌忘惡歲小婦紅粧穗簪髻詔書寬大與天通逐熟淮南幾誤計

種麥

前人

墾地播宿麥飯牛臨野池未能食佛日正恐失農時斫斫鋤耨力勤勤祝史詞嘉平得三百吾飽豈無期

次韻袁起巖瑞麥

范成大

此麥兩岐已黃熟其間又出一青枝亦已秀實傳記所未載也

民和神福固其宜况有仁先四者施吳稻即看收再熟周牟先已秀雙岐薰風牛老黃金穗梅雨重春綠玉枝樂不可支聊發詠田間日日是芳時

刈麥行

前人

菊花開時我種麥桃李花飛麥叢碧多病經旬不出門東坡已作黃雲色腰鎌刈熟趁晴歸明朝雨來麥沾泥犁田待雨插晚稻朝出移秧夜食粍

田園雜興

前人

高田二麥接山青傍水低田綠未耕桃杏滿村春似錦踏歌椎鼓過清明

江山道中麥熟

楊萬里

黃雲割露幾肩歸紫玉炊香一飯肥却破麥田秧晚稻未教水牯臥斜暉

麥

前人

無邊綠錦織雲機全幅青羅作地衣個是農家真富貴雪花消盡麥苗肥

農謠

方岳

春雨初晴水拍堤村南村北鵲鵲啼含風宿麥青相接刺水柔秧綠未齊

小麥青青大麥黃護田沙逕遶羊腸秧畦岸水初飽塵甑家家飯已香

大麥毒行

明宋濂

任生累葉居章丘僮妾指千百馬牛文軒綵閣插雲上脰管繁弦邀客畱閒時好把道書讀日啖湯餅無時休一朝陰厥忽仆地六脈隱約如蝦游移時開痛拂衣起喜氣入面輕黃浮自言恍惚有奇遇不超乘耕觀十洲初逢一身臥空曠手足僵動無寸柔大神持刀剖心腹洞見十二仙家樓紅光眩眼視閃爍後先楹戶皆朱紫絳衣女子導以入手執幢節懸銀流入宮升殿謁女主美艷可使春花愁鴛鴦曳裙珮環玉芙蓉仍插金搔頭五明扇遮九龍座珍珠簾掛珊瑚鉤分班就坐未及語有勅大官催進羞須臾水陸盡交錯玉盤擎脯堆紅虬女樂翻翻次第舉搗等彈瑟鳴篴篴燕罷瑤階月初轉餘情不斷魚含鉤紫州小姑遽餐別陽春一曲翻新謳隱雷作聲忽驚覺却厭人世真蜉蝣若非名登九天籍安得俗駕攀真儔室中宴坐絕羣血扇鑄不許他人抽或為妍唱感星類水禽山雀爭喧啾如斯歲發至六七猶怨闕遠難冥搜家人共怪狐鬼惑握粟出卜城南頭亟醫迭進獻方技何異白石江水投相里先生來自陝織目入鬢清於秋腰懸藥壺大如斗吐言便覺水生喉且云餅中大麥毒陰氣不決為人尤必須陽精可制勝驅逐惡厲誅陰會嵩嶽丹砂我獨得迎陽搗就光油油便烹蘆朮和為液祛疾有同鷹脫鞵三齋七戒始敢

服後所見非前伴侍臣朱裳多故惡執樂不作含
深憂再服戶檻皆變白素衣對泣聲伊嘯三服宮闈
鼓且側左右紛亂如驚鷗女主戎裝急奔竄上車歷
錄行荒陬迅霆一擊前殿火虐篋四射森戈矛自茲
神觀漸復舊方與人事通網繆嗚呼我人最靈貴一
爲病蠱忘身謀孰知無病亦顛倒沈蝕聲利甘拘囚
紛紛白晝混人鬼老死竟不分薰穢當持六經鍊爲
藥盡療天下蒼生瘳

打麥詞

高啓

雉雞高飛夏風暖行割黃雲隨手斷疎莖短若牛毛
垂去冬無雪不相疑場頭負歸日色白穗落連枷聲
拍拍呼兒打曬當及晴雨來怕有飛蛾生臥驅鳥雀
非愛惜明年好收供爾食

麥秀兩岐頌

林儒

我聞張堪爲令時田中有麥秀兩岐漁陽民樂不可
支清風千載歌謠詞又聞岐州魏刺史異政昭昭播
遐邇來年五穗同一莖頌聲洋洋猶在耳鄧侯本是
瀛州仙前年作宰來琴川比及三年德化宣上安下
順無尤愆會將三白占臘前今茲美麥非偶然儲祥
孕秀來自天崑崙臨風共相倚鬢髮垂雨齊無偏一
莖今兩穗西陌兮東阡黃雲漠漠兮遙相連上天有
意活民命四郊百姓歌豐年靈芝五色不足數嘉禾
同穎疑並傳鄧侯侯仁且賢名與張魏爭後先今
將述職朝天去天官考最須超遷瑞麥之歌止于此
愧無巨筆如長椽

瑞麥嘉禾頌

李三友

野有麟兮麟有角麟角雖可珍何如一莖雙穗麥與

穀穫之穫之萬民無枵腹矯首頓足何以爲祝豈弟
君子萬年遐福

又

野有鳳兮鳳有翩鳳翩雖可珍何如一莖雙穗穀與
麥穫之穫之萬民無菜色舉手加額何以報澤豈弟
君子斯男則百

瑞麥嘉禾吟

張朱明

君不見漁陽太守張堪麥雙秀分芒相絡繹又不見
中牟仙吏魯恭禾聯跼共蒂兩婆娑奇蹟當年各一
爾千載猶能馨青史何况如今一歲中瀟瀟次第見
芳叢翠浪重重翻夏日金莖落落落秋風倚歎嘉瑞
豈徒然爲有神君是呂虔當衙必韻流焦尾行部潘
花照錦韞瑞鳳祥麟公可伍休徵所以致阿堵願得
令公常似公寧愁穀賤不如土

瑞麥歌

左傑

頌嘉靖二十八年恩縣學東瑞麥
卓哉后稷心怛惻拉我蒸民賴爾極儒官客與誇周
頌感激亦知勤稼穡春杪甘霖應肅時貝丘沃土悉
含滋洋池瀾瀾凝佳氣牟麥幪幪秀兩岐薰風鼓盪
黃雲結披香正是朱明節充箱粟栗慶豐年薦熟浮
浮翻玉屑憶昔成王不敢康三穗一華信爲祥當今
天子重農扈明明上帝錫遐昌君不見竭去髦士富
文史恭承嘉運從茲始定有異才際飛龍出入蓬萊
賡喜起

麥浪

申時行

芄芄秀色挺來牟片片黃雲似水流風作跳波時隱
見雨添新漲乍沈浮晴畦錦漾千層澱寒隴濤生四

月秋却怪狂瀾頻起陸漫教文偉賦中收
太廟薦麥 董其昌

閔宮朝啓肅精禋御苑來牟及薦新九葉靈光開大
曆雙岐瑞穎獻昌辰辰風迴玉几馨先稷露稟金莖潔
似嶺一自寢園祈報後於皇清頌遍周民

麥部選句

漢枚乘七發麥秀漸兮雉朝飛蕭音
魏黃觀疏今年麥苗雖好臨熟多雨而悉復偃壞小
麥略盡惟穰麥大麥頗得半收耳

晉潘岳射雉賦麥漸漸以擢芒
宋謝朓詩麥候始清和

齊王僧達詩麥隴多秀色
邢昺詩風輕麥候初

周庚信詩麥隨風裏熟
陳江總詩麥氣涼昏曉

唐李嶠詩瑞麥兩岐秀
盧從愿詩薈卑起麥涼

張謂詩秋風麥穗黃
蕭穎士詩麥秋田野喧

王維詩雉雉麥苗秀
李白詩荊州麥熟蘭成蛾

又麥隴青青三月時
杜甫詩白屋花開裏孤城麥秀邊
又山田麥無隴春
氣晚更生
又崆峒小麥熟
又微麥早向熟
又細麥落

輕花又青樊陵陂麥又涼州白麥枯

儲光義詩麥涼浮隴雄媒低

柳宗元詩麥芒際天搖青波

韓愈詩南陽郭門外桑下麥青青又暖風抽宿麥

孟郊詩麥風清冷吹

李賀詩麥雨漲溪田又野家麥畦上新塋

白居易詩四月未全熟麥涼江風秋又岐秀麥分花

又獨出門前望野田月明蕎麥花如雪

元稹詩年年四五月蠶實麥小秋

司空圖詩綠樹連村暗黃花入麥稀

溫庭筠詩日暮鳥飛散滿山蕎麥花

張蠟詩句麥深藏堆

朱慶餘詩麥風吹雨正徘徊

薛逢詩晚麥芒乾風似秋

薛能詩鄰驚麥野聞雞雉

杜荀鶴詩高下麥田新雨後又分開野色收新麥

宋韓琦詩雲鋪蕎麥花漫野

夏竦詩似法陰文呈六穗或符陽數效三岐

石介詩使麥長熟人不饑敢告吾君不須赦又麥宜

過社猶催種

歐陽修詩四月田家麥穗稠

王安石詩無端隴上脩脩麥橫起風寒占作秋又晴

日暖風生麥氣又麥漲一溪雲

范純仁詩潤催隴麥將黃節寒阻春蠶起早眠

蘇軾詩登城望平麥綠浪風掀舞又夏旱隴麥人又

麥熟旋供湯餅新

唐庚詩睡外莫聽泥活活想中已睹麥含含又雀飛

田有麥

汪藻詩麥隴如人深

王阮詩麗日借黃催麥隴

戴敏詩頻動詩人興滿園蕎麥花

范成大詩麥裏綠叢高又麥雨一犁隨處綠又青黃

麥隴平平去又落日青山都好在山間蕎麥滿芳洲

陸游詩但見古河東隴麥如鋪雪又京塵日念家山

樂見值腰鎌割麥初又雨具禾頭蒸耳出潤憂麥粒

化蛾飛又已過西成賽廟期家家下麥不容遲又歷

車麥穗黃雲卷食葉蠶聲白雨來又山村處處晴收

麥鄰曲家家午曬絲又鰲熟山僧分餽船來溪友

餉薪樗又水面秧青麥半黃又雪花漫漫麥將熟又

土膏動後麥苗長又滿村蕎麥正離離又暖日暉暉

秀蕎麥又未收蕎麥怯新霜

楊萬里詩紅紅白白花臨水碧碧黃黃麥際天

危禎詩麥風翻隴潑濃綠花露滴枝黏老紅

吳潛詩吳波亭下繫扁舟輕雨輕寒又麥秋

盧贊元詩麥秋天氣朝朝變蠶月人家處處忙

戴復古詩梯山畦麥秀又鍛磨鳴時大麥黃

黃公度詩晴添麥隴黃又乍寒乍暖麥秋天

譚知榮詩麥隴風來翠浪浮

金王渥詩穀雨連朝沒麥場

宇文虛中詩彌隴連天麥浪寒

麻九疇詩野黃麥初割畦綠蔬纔灌又笋輿歸路麥花香

元好問詩一犁春雨麥青青又靄靄蒼波麥已勻

王元粹詩青青道邊麥知是誰家田

吳激詩風雨麥秋寒

王良臣詩蕎花冉冉蜜脾香

元方夔詩山田麥苗肥

方回詩夏前十日嘗新麥

耶律楚材詩萬頃青青麥浪平

馬祖常詩滋麥春膏覆隴齊

謝應芳詩天假春晴養麥苗

袁桷詩土沃村村麥

貢奎詩路轉滿川蕎麥花

欽定古今圖書集成博物彙編草木典
第三十四卷目錄

麥部紀事
麥部雜錄
麥部外編

草木典第三十四卷

麥部紀事

路史黃帝有熊氏命庸光辨乎南以爲司徒而正夏
種芒穀注謂南種小麥赤又大封辨乎西以爲司馬
種蓬穀注謂西種白麥金穀故秋種夏死
汲冢周書維四年孟夏王初祈禱於宗廟乃嘗麥于
太祖

史記微子世家箕子朝周過故殷虛感宮室毀壞生
禾黍箕子傷之欲哭則不可欲泣爲其近婦人乃作
麥秀之詩以歌詠之其詩曰麥秀漸漸兮禾黍油油
彼倭僮兮不與我好兮所謂倭僮者紂也殷民聞之
皆爲涕泣

穆天子傳天子西征至於赤鳥之人獻稌麥百載
天子西征至于鷄韓氏爰有樂野溫和稌麥之所草

鷄音
黑水之阿爰有野麥

左傳隱公三年夏四月鄭祭足帥師取溫之麥秋又
取成周之禾

管子輕重乙篇桓公曰寡人欲毋殺一士毋頓一戟
而辟方都二爲之有道乎管子對曰涇水十二空汶
淵沫涑滿三之於乃請以令使九月種麥日至日穫
則時雨未下而利農事矣桓公曰諾令以九月種麥
日至而穫量其艾一收之積中方都二故此所謂善
因天時辯於地利而辟方都之道也

公羊傳莊公六年秋無麥苗無苗則曷爲先言無麥
而後言無苗一災不書待無麥然後書無苗
穀梁傳莊公二十八年冬大無麥禾大者有顧之辭
也於無禾及無麥也

左傳成公十年晉侯夢大厲被髮及地搏膺而踊曰
殺余孫不義余得請于帝矣壞大門及寢門而人公
懼入于室又壞戶公覺召桑田巫巫言如夢公曰何
如曰不食新矣公疾病求醫於秦秦伯使醫緩爲之
未至公夢疾爲二豎子曰彼良醫也懼傷我焉逃之
其一曰居肅之上肅之下若我何醫至曰疾不可爲
也在肅之上肅之下攻之不可達之不及藥不至焉
不可爲也公曰良醫也厚爲之禮而歸之六月丙午
晉侯欲使甸人獻麥饋人爲之召桑田巫示而殺
之將食張如廁陷而卒

孔子家語宓子賤爲單父宰齊人攻魯道由單父單
父之老謂曰麥已熟矣今齊寇至不及人人自收其
麥請放民出皆穫傅郭之麥可以益糧且不資於寇
三請而宓子不聽俄而齊寇逮於麥季孫聞之怒使
人讓宓子曰民寒耕熱耘曾不得食豈不哀哉不知
猶可以告者三而子不聽非所以爲民也宓子蹙然
曰今茲無麥明年可樹若使不耕者穫是使民樂有

寇且得單父一歲之麥於魯不加強喪之不加弱若
使民有自取之心其創必數世不息季孫聞之赧然
而愧曰地若可入吾豈忍見宓子哉
漢書食貨志董仲舒說上曰春秋他穀不書至於麥
禾不成則書之以見聖人於五穀最重麥與禾也
今關中俗不好種麥是歲失春秋之所重而損生民
之具也願陛下幸詔大司農使關中民益種宿麥令
毋後時注師古曰宿麥謂其苗經冬

博物志漢武帝時光陽縣雨麥
拾遺記宣帝地節元年有背明之國來貢其方物有
延精麥延壽益氣有昆和麥調暢六府有輕心麥食
者體輕有醇和麥爲麴以釀酒一醉累月食之凌冬
可租有含露麥穰中有露味甘如飴

後漢書光武本紀詔曰久旱傷麥秋種未下朕甚憂
之

馮異傳王郎起光武自薊東南馳至南宮遇大風雨
光武引車入道傍空舍光武對電燎衣異進麥飯菟
肩因復度虓沱河

高鳳傳鳳少爲書生家以農畝爲業而專精誦讀書
夜不息妻嘗之田曝麥於庭令鳳護雞時天暴雨而
鳳持竿誦經不覺潦水流麥妻還怪問鳳方悟之後
遂爲名儒

范冉傳冉與王奐親善奐爲考城令屢遣書請冉冉
不至及奐遷漢陽太守將行冉乃與弟協步齋麥酒
於道側設壇以待之

井丹傳丹性清高未嘗修刺候人建武末沛王輔等
五王居北宮皆好賓客更遣請丹不能致陰就以外

威貴盛乃詭說五王求錢千萬約能致丹而別使人要劫之丹不得已既至就故為設麥飯葱葉之食丹推去之曰以君侯能供甘旨故來相過何其薄手更致盛饌乃食

張堪傳堪拜漁陽太守百姓歌曰桑無附枝麥秀兩岐張公為政樂不可支

東觀漢紀第五倫免歸田躬與奴共發棘棘田種麥董宣為洛陽令卒官詔遣使視唯見布被覆屍妻子對哭有大麥數斛

鄧禹平三輔糧乏王丹上麥二十斛禹高其節義表丹領左馮翊

續漢書羊續為南陽太守妻與子祕俱往郡舍續閉門不納妻自將祕行其資藏惟布衾弊襦鹽麥數斛

三國志太祖本紀注太祖常出軍行經麥中令士卒無敗麥犯者死騎士皆下馬付麥相持於時太祖馬騰入麥中勅主簿議罪主簿對以春秋之義罰不加於尊太祖曰制法而自犯之何以帥下然孤為軍帥不可殺請自刑因援劍割髮以置地

秦子孔文舉為北海相有母病思食新麥家無乃盜鄰熟麥而進之文舉聞之特賞曰不必來謝但勿盜也盜而不罪者以為勤於母也

英雄記呂布令韓暹楊奉取劉備地麥以為軍資諸葛恪別傳孫權嘗蜀使費禕禕停食餅索筆作麥賦恪亦請筆作磨賦咸稱善焉

三國典略李岳為門客所說舉錢營生廣收大麥載赴晉陽候其寒食以求高價清明之日其車方達又從晉陽載回鄴城路逢大雨並化為泥息利既少乃

至貧迫當世人士莫不笑之

搜神記管輅行至南陽平原見一少年在田中割麥輅歎曰兒壽多是天亡汝卯日往割麥地南大桑樹下有二人圍棋汝但將酒脯致于前他自飲之飲盡便斟以盡為度若問汝汝但拜之慎勿言必合有人救汝也

集仙傳王老慕道有道士遍身瘡瘍曰得酒浸之老為置酒滿甕道士坐甕中三日鬚髮皆黑曰飲此可仙時方打麥飲之忽輕舉空中猶聞打麥聲

晉書食貨志元帝太興元年詔曰徐揚二州土宜三麥可督令煖地投秋下種至夏而熟繼新故之交於以周濟所益甚大昔漢遣輕車使者汜勝之督三輔種麥而關中遂穰勿令後晚其後頻年麥雖有旱蝗而為益猶多

王褒傳哀家貧躬耕計口而田度身而蠶或有助之者不聽諸生密為刈麥哀遂棄之

符健載記京兆杜洪竊據長安自稱晉征北將軍雍州刺史戎夏多歸之健密圖關中懼洪知之乃偽受石祇官繕官室於枋頭課所部種麥示無西意有知而不種者健殺之以徇

庾哀傳哀母終服喪居於墓側歲大饑藜羹不糝門人欲進其飯者而哀每日已食莫敢為設及麥熟穫者已畢而採摺尚多哀乃引其羣子以退曰待其間及其掘也不曲行不旁撿掘而把之則亦大獲

五行志王恭鎮京口舉兵誅王國寶百姓謠云昔年食白飯今年食麥粳天公誅譴汝教汝捻噉喉噉喉噉復噉京口敗復敗識者曰昔年食白飯恭得志也

今年食麥粳噉噉其精已去明將敗也天公將加譴譴而誅之也捻噉喉氣不通死之祥也敗復敗丁

寧之辭也恭尋死京都又大行欽疾而喉並喝焉大和末童謠曰犁牛耕御路白門種小麥及海西公被廢百姓耕其門以種小麥遂如謠言

述異記晉末嘉中梁州雨七旬變化為飛蛾元晏春秋衛倫過予言及於味稱魏故侍中劉子陽食餅知鹽生精味之至也予曰師曠識勞薪易牙別

溜澠子陽今之妙也定之何難倫因命僕取糧糗以進予曰麥也有杏李奈味三果之熟也不同于焉得兼之倫笑而不答退告人曰士安之識過劉氏吾將來家實多故杏時將發糗以杏汁李奈將發又糗以李奈汁故兼三味

陳雷者舊傳高式至孝末平中蜂蝗為災獨不食式麥

西域諸國志天竺十一月六日為冬至則麥秀十二月十六日為臘則麥熟

拾遺記張華為九醞酒以三薇清麴麴藥出西羌鞠出北方北方有指星麥四月火星出麥熟而穫之藥用水漬麥三夕而萌芽平日雞鳴而用之俗人呼為雞鳴麥以之釀酒醇美久含令人齒動若大醉不叫笑搖蕩令人肝腸消爛俗人謂為消腸酒

前秦錄初苻健聞桓溫之來伐也芟麥以待之故溫掠無所得軍人大饑

新羅王遣使貢其方物在百濟東去長安九千八百里其人食麥

前涼錄末嘉三年嘉麥一莖九穗生於姑臧

張駿九年雨稼穀於武威燉煌種之皆生因名天麥博物志近世有田夫至巧而不自覺也其婦稱之猶不自信乃刻木爲麥入市糶之糶者無疑歸磨乃覺非麥

宋書符瑞志晉武帝太康十年六月嘉麥生扶風郡一莖九穗是歲收三倍

南齊書世祖本紀末明四年夏四月臨沂縣麥不登刈爲馬芻至夏更苗秀

劉懷慰傳懷慰爲齊郡太守修治城郭安集居民墾廢田二百頃決沈湖灌溉不受禮謁民有餉其新米一斛者懷慰出所食麥飯示之曰且食有餘幸不煩此因著廉吏論以達其意

庾易傳易志性恬隱不交外物臨川王映臨州獨重易上表薦之餉麥百斛易謂使人曰民樵採麋鹿之伍終其解毛之衣馳騁日月之車得保自耕之祿於大王之恩亦已深矣辭不受

梁書任昉傳昉爲義興太守在任清潔兄妾食麥而己

陳書徐孝克傳孝克爲散騎常侍侍東宮陳亡隨例入關家道壁立所生母患欲粳米爲粥不能常辦母亡之後孝克遂常噉麥有遺粳米者孝克對而悲泣終身不復食之焉

南史吳明徹傳明徹有粟麥三千餘斛而鄰里饑餒乃白諸兄與鄉里計口平分同其豐儉賴以存者甚衆

孝義傳沈崇係母卒葬後更行服三年久食麥屑不噉鹽酢

魏書樊子鵠傳子鵠除殷州刺史屬歲旱儉子鵠恐民流亡乃勒有粟之家分貸貧者并遣人牛易力多種二麥州內以此獲安

釋老志東萊人王道翼少有絕俗之志隱韓信山四十餘年斷粟食麥

水經注汶水入萊蕪谷出谷有平丘面山傍水土人悉以種麥云此丘不宜植稷黍而宜麥齊人相承以植之

北齊書孟業傳業遷東郡守以寬惠著其年麥一莖五穗其餘三穗四穗其一莖合郡人以爲政化所感

隋書張文謂傳文謂每以德化人鄉黨頗移風俗嘗有人夜中竊刈其麥者見而避之盜因感悟棄麥而謝文謂慰諭之自誓不言固令持去經數年盜者向鄉人說之始爲遠近所悉

唐書許敬宗傳高宗即位敬宗爲弘文館學士帝將立武昭儀大臣切諫而敬宗陰揣帝私即妄言曰田舍子賸獲十斛麥尚欲更故婦天子富有四海立一后謂之不可何哉帝意遂定

舊唐書高宗本紀儀鳳三年五月幸九成宮秋七月宴近臣諸親於咸亨殿上謂霍王元軌曰去冬無雪今春少雨自避暑此宮甘雨頻降夏麥豐熟秋稼滋榮

元宗本紀上自於苑中種麥率皇太子已下躬自收穫謂太子等曰此將薦宗廟是以躬親亦欲令汝等知稼穡之難也因分賜侍臣謂曰比歲令人巡檢苗稼所對多不實故自種植以觀其成且春秋書麥禾豈非古人所重也

天寶三載三月武威郡上言番禾縣天寶山有醴泉湧出嶺石化爲瑞餅遠近貧乏者取以給食改番禾爲天寶縣

唐書劉禹錫傳禹錫由和州刺史入爲主客郎中復作遊元都觀詩且言始謫十年還京師道士植桃其盛若霞又十四年遇之無復一存唯免葵燕麥動搖春風耳以詆權近

杜陽雜編元和八年大軫國貢碧麥紫麥米麥大於中華之麥粒表裏皆碧香氣如粳米食之體輕久則可以御風紫麥有類荳蔻炊一升得飯一斗食之令人髭髮黑顏色不老久則後天不死上因中元日薦於元元皇帝故當時道士有得食者

唐國史補竇氏子言家方盛時有奴厚斂羣從數宅之資供白麥麪醫云白麪性平由是恣食不疑凡數歲未嘗生疾其後有奴告其謬妄所輸麪乃常麥非白麥也羣從諸宅一時暴熱皆發

雲仙雜記牛僧孺進士時嘗麥芒刁字有繆誤隨手刪割點定

無棣有灰山山南有石竅其中二麥無數取之不極孔帖同昌公主出降賜金麥銀米共數斛此皆條枝國獻

高昌土沃麥皆再熟

梁宋州節度使友諒進瑞麥一莖三穗太祖怒曰宋州大水何用此爲

五代史同鵠傳同鵠地宜白麥青麥繅麥

遼史聖宗本紀統和二十年十二月南京平州麥秀兩岐

宋史五行志乾德四年四月府州尉氏縣雲陽縣並有麥兩岐五月魚臺縣麥秀三岐

開寶八年五月鄭州梓州合州巴州縣並獻瑞麥太平興國三年四月夏縣五月舒州六月閬州麥並秀兩岐

五年九月流溪縣六年五月汝陰縣九年五月施州麥並秀兩岐

端拱元年五月陳州淳化元年四月魏城縣七月閬州二年四月蔡州五月陳州陵州仁壽縣四年五月

達州五年四月永城縣並獻瑞麥

至道二年五月泗州獻瑞麥

三年四月唐州遂州盤石縣並獻瑞麥五月黃州建昌軍麥秀二三穗

咸平元年五月曲水縣麥秀二三穗

二年五月華州麥秀二三穗

三年五月鄆縣海陵縣並麥秀二三穗

大中祥符元年曲水縣南鄭縣並麥秀二三穗

三年四月同州麥秀二三穗

四年四月六安縣麥秀二三穗五月唐汝廬宿泗濠州麥自生

五年四月遂州麥秀兩穗或三穗

六年三月邕州麥秀兩穗或三穗

七年三月鄆城縣麥秀兩穗三穗

八年湖陽縣麥秀兩穗三穗

九年四月建初縣麥秀兩穗或三穗

乾興元年五月南劍州麥一本五穗絳州麥秀兩岐

天聖六年五月乙未陳州瑞麥一莖二十穗六月陳

州獻瑞麥圖

皇祐三年五月彭山縣上瑞麥圖凡一莖五穗者數

本帝曰朕嘗禁四方獻瑞今得西川秀麥圖可謂真

瑞矣其賜田夫束帛以勸之是月滁州麥一莖五穗

五年閏六月資州麥秀兩岐

至和二年五月亳州麥秀兩岐六月應天府貢大麥

一本七十穗小麥一本二百穗

嘉祐三年六月絳州麥一穗兩岐七月泰山上瑞麥

圖凡五本五百一穗

四年六月彰明縣有麥兩岐百餘本

熙寧八年懷安軍瀘州渠州各麥秀兩岐

九年譙縣麥一本三穗尉氏縣湖陽縣彭城縣麥一

本兩穗渠州大麥一穗兩岐或三岐四岐者陽翟縣

麥秀兩岐天興寶雞二縣皆麥秀兩岐仍一本有三

四穗或六穗者石州安州麥秀兩岐

元豐元年邢州麥秀兩岐夔州麥一本三穗

二年簡州安德軍麥秀兩岐

三年涿州麥秀兩岐或三四穗凡四十畝眉州麥秀

兩岐

四年徐州麥一本百七十二穗

七年合州麥秀兩岐

八年亳州麥一莖二穗一莖三穗一莖四穗

元祐三年劍州安國軍麥秀兩岐夔州麥一本十二

穗

四年泰寧軍麥異畝同穎

五年普州麥一莖雙穗夔州麥秀五岐

六年汝陽縣美原縣兗州鄒縣麥一莖數穗

七年固始縣麥有雙穗定陶縣丹陽縣麥秀兩岐

紹聖元年博野縣麥一本五穗漢陽軍麥秀兩岐樂

壽縣麥一本兩穗或三穗

三年瑕丘縣武陽縣陝城小溪四縣麥合穗良原縣

沈丘縣長子縣麥秀兩岐

四年河中府麥秀三穗虹縣雲安縣麥秀兩岐茂州

一枝兩穗汶山縣一枝三穗至六穗

元符元年內鄉縣麥一莖兩穗符離靈璧臨渙新虹

五縣麥秀兩穗兩當縣麥秀三穗安平縣生瑞麥

二年連水軍麥合穗十一月岷州宕昌若生瑞麥

大觀二年簡州麥秀兩岐

三年武信軍瀘遂普州麥秀兩岐

四年蔡州麥一莖兩岐至七八岐者九十畝

政和元年蔡州麥一莖兩岐或三五岐至八九畝近

約十畝遠或連野

禮志太宗太平興國三年四月觀刈麥

九年五月二日出南薰門觀稼召從臣列坐田中令

民刈麥咸賜以錢帛回幸玉津園觀漁張樂習射既

宴而歸明年五月幸城南觀麥賜田夫布帛有差

仁宗天聖三年夏觀南御莊刈麥

仁宗皇祐五年後苑寶政殿刈麥謂輔臣曰朕新作

此殿不欲植花歲以種麥庶知穡事不易也自是幸

觀穀麥惟就後苑

薦新之禮夏五月嘗麥配以錢秋季月嘗蕎麥

樂志端拱初諸州麥兩穗三穗者連歲來上有司請

以爲瑞麥之曲薦於朝會用之

張錫傳張錫福州閩縣人梁末劉君鐸任棣州刺史

辟爲軍事判官棣爲鄆之屬郡郡有勸務鄆以牙將主之頗橫恣民有犯勸三斤牙將欲寘於死君鐸力不能救既而牙將盜麥百斛私造勸事覺錫判曰勸犯三斤求生不克麥盜百斛免死誠難時郡吏以使府牙將乞免錫不允固寘於法

宗室傳魏惠憲王愷判明州輟屬邑田租以贍學得兩岐麥圖以獻帝復賜手詔曰汝勸課藝植農不游惰宜獲瑞麥之應加愷荆南集慶軍節度使行江陵尹尋改永興成德軍節度使揚州牧

冷齋夜話范文正公在睢陽遣堯夫於姑蘇取麥五百斛堯夫時尚少既還舟次丹陽見石曼卿問寄此久近曼卿曰兩月矣三喪在淺土欲葬之西北歸無可與謀者堯夫以所載舟付之單騎自長蘆捷徑而去到家拜起侍立良久文正曰東吳見故舊乎曰曼卿爲三喪未舉畱滯丹陽時無郭元振莫可告者文正曰何不以麥舟付之堯夫曰已付之矣

丹鉛錄范文正公安撫江淮進民間所食烏昧草乞宣示六宮傳諸戚里以抑奢侈烏昧草卽今之野燕麥淮南謂麥曰昧故史從音爲文

燕麥滇南霑益一路有之土人以爲朝夕常食非虛名也

東坡志林江湖間有鳥鳴於四五月其聲若云麥熟卽快活今年二麥如雲此鳥不妄語也

東坡詩註今大內當麥熟時以黃羅帕封賜百官其外題曰鈔或云以蜜漬食九佳

墨莊漫錄蔡元度魯公在位錫資無窮而用度亦廣京師感慈寺修浮圖題三千緡時有吳鍊師者丹陽

人辟穀修養館於西園菴中後有隙地吳勸令時麥既穫頗厭狼藉公見之題詩於菴曰塔緣便捨三千貫月俸無踰一萬緡却向西園課小麥老來顛倒是愁人

洞徵志齊州有人病狂云夢中見紅裳女子引入宮殿中小姑令歌每日遂歌云五靈樓閣曉玲瓏天府由來是此中惆悵閑懷言不盡一丸蘿蔔火吾宮有一道士云此犯大麥毒也少女心神小姑脾神醫經言蘿蔔制麴毒故曰火吾宮火者毀也遂以藥并蘿蔔治之果愈

金史熙宗本紀皇統三年五月丁巳朔京兆進瑞麥六月庚辰太原路進獬豸并瑞麥

五行志宣宗興定元年四月陳州商水縣進瑞麥一莖四穗開封府進瑞麥一莖三穗二莖四穗

元史五行志至元七年夏東平府進瑞麥一莖五穗十一年興元鳳州進麥一莖七穗

十八年八月壬寅瓜州屯田進瑞麥一莖五穗二十三年五月廣元路閬中麥秀兩岐

二十四年八月濬州進瑞麥一莖五穗至元四年五月彰德臨漳縣麥秀兩岐有三穗者

至正十年彰德路穀麥雙穗二十六年五月洛陽縣康家莊有瑞麥一莖五穗雙穗三穗者甚衆

王磐傳王磐字文炳廣平末年人世業農歲得麥萬石鄉人號萬石王家

江寧府志吳元年五月句容麥生一莖兩穗宣城縣志洪武二年四月宣城產瑞麥

博物彙編草木典第三十四卷麥部

淮安府志洪武二年四月淮安獻瑞麥羣臣表賀丹陽縣志洪武三年丹陽孫宗彝田名千石墟產瑞麥一莖五穗

深陽縣志明洪武初嘉竹瑞麥生湧幢小品洪武初一儒赴召太祖問曰習何經曰業

農太祖曰汝知麥禾之節不同乎對曰禾三節麥四節禾播種于春至秋而穫凡歷三時故三節麥則歷四時始成故四節太祖曰是能知稼穡者卽擢某州知州

木蘭國有三寸之麥重慶府志洪武十三年安居龍化山麥秀三本二岐陝西通志永樂三年寧夏產兩岐麥數莖

南陽縣志明末樂五年南陽產瑞麥兩岐是年大有新野縣志永樂五年夏五月產瑞麥多兩岐或有五岐者是歲大有年

西安府志宣德中嘉麥生茂陵一莖九穗茂州志宣德間茂州知州陳敏獻瑞麥兩岐至九岐者百餘本宣宗皇帝御製滿庭芳詞并綵緞鈔錠以賜陳敏

新野縣志宣德四年麥秀兩岐崇明縣志正統五年瑞麥一本有三穗者

鶴慶府志景泰五年逢密鄉瑞麥一莖數穗知府王珉以獻

歙縣志天順元年郡境有瑞麥休寧縣志天順元年潤橋田間麥一莖四穗者一本

一莖兩穗者四十五本知縣王謙呈送本府知府孫遇函進以聞

第五三四冊 之〇八葉

大名府志天順五年夏麥有兩岐者

固始縣志成化三年產瑞麥

常熟縣志成化八年麥秀兩岐

漢中府志成化十二年麥生二穗

永昌府志成化十四年夏騰衝學官產麥一穗三岐

淮安府志成化十七年睢寧李家莊麥有一莖三穗

者越二年癸卯水南義陳二莊麥有一莖三穗者

吳縣志成化二十年甲辰四月縣境產瑞麥

徐州志弘治元年仁壽鄉麥一莖四穗二本一莖三

穗五本一莖兩穗六本

鄧州志弘治六年產瑞麥

常熟縣志弘治十年麥秀兩岐

金壇縣志弘治十四年四月生瑞麥一莖兩穗岳陽

村尤盛

貴溪縣志弘治十四年辛酉十月雨麥

丹陽縣志弘治十五年丹陽延陵鎮麥一莖兩穗

寶應縣志弘治十七年產瑞麥有雙岐三岐四岐五

岐者

陝西通志弘治十八年臨洮府金縣瑞麥有一莖兩

穗者十餘本

嘉定縣志正德二年丁卯南郊麥秀三岐邑民楊璣

獻百穗於郡守

松江府志正德五年夏麥多岐穗

上海縣志正德五年庚午麥生數岐者甚多

江陰縣志正德七年均山鄉麥秀兩岐

溫州府志正德七年樂清瑞應鄉麥一本五六穗或

二四穗

太和縣志正德十三年戊寅麥秀兩岐百餘莖

泉州府志正德十三年南安縣麥一莖兩穗同安縣

麥一莖五穗

新野縣志正德十三年三月邑西江石灘天雨粟麥

週圍十餘里是歲其地大稔

崇明縣志正德十五年十一月二麥穎

江陰縣志正德十五年冬麥抱穗而華

六合縣志正德十六年麥有兩穗

蒙城縣志正德十六年麥秀二岐

穎上縣志嘉靖癸未麥秀三穎或五穎

永豐縣志嘉靖癸未春麥大登間有一莖兩岐者

鎮平縣志嘉靖四年夏麥一莖二岐甚有四五岐

濬縣志嘉靖四年濬麥穗兩岐

新野縣志嘉靖八年麥秀兩岐

商州志嘉靖八大有麥禾有三穗或五穗者

漢中府志嘉靖十一年褒城麥秀五岐

固始縣志嘉靖十五年大有年麥秀兩岐

金壇縣志嘉靖十六年四月生瑞麥一莖三穗者一

本一莖兩穗者尤多

虹縣志嘉靖戊戌夏雜麥一莖兩穗間有三四穗者

本年斗麥十錢

新安縣志嘉靖十八年夏四月新安產瑞麥一莖八

九岐

五河縣志嘉靖十八年本境產瑞麥有一莖三四穗

者

河陽縣志嘉靖二十年四月產瑞麥一本三岐

虹縣志嘉靖壬寅錢千文雜麥十四斛大麥三十斛

睢寧縣志嘉靖二十三年麥有一莖三岐者歲大熟

永平府志嘉靖二十五年昌黎麥二岐

鹽城縣志嘉靖二十七年董家橋產麥穗雙岐其年

大熟

永昌府志嘉靖三十二年四月保山縣南郊產麥一

本三岐上復爲一穗

鄧州志嘉靖三十四年夏鄧州產瑞麥

興化縣志嘉靖三十五年仰止祠生雙穗麥二本

永壽縣志嘉靖三十六年夏麥雙岐

蘭谿縣志嘉靖三十九年三十四都徐環家產瑞麥

六穗者一本五穗者一本四穗者二本三穗者四本

二穗者甚多

大理府志嘉靖四十一年五井提舉司界麥秀兩岐

或三岐

虹縣志嘉靖癸亥小曲里地大麥一莖三五穗者不

計數

泰興縣志隆慶元年麥二岐

松江府志隆慶二年冬十月雷電桃李花麥秀梅杏

實

宿遷縣志隆慶己巳山東益都宋公伯華來知縣事

政尚寬和明年田間麥秀有一本四岐至五岐者

霍丘縣志隆慶四年五月城南麥秀兩岐

六合縣志萬曆二年產瑞麥西里民獻麥兩穗

虹縣志萬曆甲戌草溝集地大麥一莖四五穗陡門

村地亦有之

宿遷縣志萬曆三年四月二十八日知縣喻文偉勸

荒至峒嵒地方鄉耆徐鉞等十數叟各持雙岐麥呈